

Omča oko mreže podrške se steže

Tokom današnje posjete Zvorniku prvi zamjenik visokog predstavnika Raffi Gregorian rekao je da međunarodna zajednica neće dopustiti “da se razvodne preduvjeti koji se postavljaju pred organe vlasti BiH – a osobito RS – u vezi sa saradnjom sa haškim sudom”.

Prvi zamjenik visokog predstavnika u Zvorniku se sastao sa Milošem Stajićem, likvidacijskim upraviteljem Privredne banke Srpsko Sarajevo (PBSS) i Slavicom Injac, direktoricom Agencije za bankarstvo RS. Prvog zamjenika visokog predstavnika zanimali su navodi o kršenju odluka visokog predstavnika o PBSS. Računi ove banke blokirani su odlukom visokog predstavnika od marta 2003. a njenom ranijem vlasniku, osuđenom kriminalcu Momčilu Mandiću, visoki predstavnik, predsjednik Sjedinjenih Američkih Država te Evropska unija izrekli su više sankcija.

“Nalog o blokiranju računa trebale su provesti institucije RS i BiH. Ukoliko se, nakon završetka ove istrage, pokaže da nadležne institucije nisu radile savjesno, poduzeće se odgovarajuće korektivne mjere,” rekao je danas prvi zamjenik visokog predstavnika.

U pratnji Howarda Tuckera, šefa Ureda Međunarodnog krivičnog suda u Bosni i Hercegovini, prvi zamjenik visokog predstavnika Gregorian danas se takođe sastao sa šefom Ureda Državne granične policije u Zvorniku, Arazom Jukićem i njegovim zamjenikom Draganom Kulićem, šefom Centra javne bezbjednosti u Bjeljini, Vasilijem Andrićem, te šefom Stanice javne bezbjednosti u Zvorniku, Stanimirom Vidovićem.

Visoki predstavnik je 2004. godine smijenio Petka Pavlovića sa mjesta komandanta zvorničkog terenskog ureda Državne granične

službe te Milorada Marića sa mjesta šefa Centra javne bezbjednosti Zvornik zbog uloga koje su igrali u omogućavanju osobama optuženim za ratne zločine da izbjegnu hapšenje. Sa osobama imenovim na te funkcije mjesta nakon smjena prvi zamjenik visokog predstavnika i gospodin Tucker razgovarali su o trenutnoj situaciji u ovoj regiji u pogledu saradnje sa haškim sudom.

OHR je uvijek dijelio odlučnost međunarodne zajednice u stavu da oni koji su dio mreža podrške ratnim zločincima ne mogu učestvovati u javnom životu. "Nije obaveza OHR-a da radi posao domaćih organa. Međutim, moramo biti uvjereni da domaći organi rade svoj posao kako treba", rekao je danas prvi zamjenik visokog predstavnika.

"Kriminalni krugovi i dalje su veza između haških optuženika i njihovih mreža podrške. Činjenica da su Radovan Karadžić i Ratko Mladić još uvijek u bijegu znači da još uvijek imaju podršku," rekao je prvi zamjenik visokog predstavnika. "U toku su razgovori između međunarodne zajednice i domaćih partnera o daljim koracima koji se mogu poduzeti kako bi se osujetile mreže podrške haškim optuženicima, tako da možete očekivati nove poteze slične onima povučenim u toku operacije '*Balkan Vice*' ".